

Curaglia, ils 29 d'avrel 2022

Stimadas clientas
Stimai clients

Duront il 4. quartal 2021 ein ils prezis d'energia s'augmentai dramaticamein ed ein dapi lu suttames a fermas fluctuaziuns. L'uiara ell'Ucraina e las sancziuns cumpigliadas cun lezza influenzeschon il provediment cun energia ell'Europa ed ei savess dar stretgas. In'ulteriura difficultad ei che la Svizra ha aunc negina cunvegna d'electricitad cun l'Uniun europeica.

Nus informein Vus davart la situaziun actuala dall'Ovra Electrica Medel (OEM), il provediment cun energia en nossa vischnaunca e co ins sa spargnar electricitad ellas casadas.

Ils prezis d'electricitad per ils clients finals ston vegnir fatgs paleis sin fundament da disposiziuns legalas tochen la fin d'uost per igl onn sequent. Il feagl da tariffas, cun resalva dall'approbaziun entras la radunonza communal, vegn publicaus sin la pagina-web dalla vischnaunca sut Ovra Electrica Medel. Igl onn 2021 havevan nus aunc buca cumprau l'electricitad per il 2022 igl uost 2021, perquei ch'il prezi pareva a nus memia aults. Duront il 4. quartal 2021 ei il prezi d'electricitad explodius, denteren sin varga 20 raps per kwh. La finala havein nus saviu comprar l'electricitad per in prezi da 14.9 raps. Quei ei marcantamein sur il prezi da vendita da 9.6 raps sco indicau sin il feagl da tariffas. Sco quei ch'il preventiv 2022 muossa, vegnin nus entras quella situaziun a far ina gronda sperdita e stuein augmentar per in bien ton il prezi d'electricitad per nos clients igl onn 2023. Il process da comprar l'electricitad havein nus adattau allas novas cundiziuns dil marcau.

Aschiditg che l'electricitad vegn buca raziunada en Svizra, ei il provediment cun electricitad en nossa vischnaunca garantius. La construcziun d'implonts solars sa contribuir alla midada energetica. Ils boilers ch'ei colligai cun in implont solar sustenin nus gia oz cun ina contribuziun da promoziun. Ulteriuras mesiras da promoziun per implonts solars e l'utilisaziun da fontaunas d'energia existentas per producir electricitad essan nus vidlunder dad examinar.

Cun mesiras sistematicas eis ei pusseivel da reducir immediat il consum d'electricitad. In pèr exempels:

- adina cuschar cun igl uvierchel sin la cazzetta, nezegiar la calira restonta;
- duvrar il buglifer per scaldar ni far buglir aua;
- buca prescaldar il fuorn;
- metter rauba schelentada ella frestgera per far sgargliar;
- far sgargliar regularmein la schelentera, ina stresa da glatsch da tschun millimeters augmenta il basegns d'electricitad per ver 30 pertschien;
- maschinas da lavar novas lavan il resti senza problems cun 20 tochen 30 grads senza ch'ins stoppi prelarar el;
- utilizar cazzolas LED, quellas drovan tochen 80 pertschien meins electricitad che cazzolas cun pers ni cazzolas da halogen;
- adina stizzar la cazzola, cura ch'ins drova negina glisch, era sche quei ei mo per in cuort mument;
- ina temperatura da stanza per in grad pli bassa spargna gia ver siat pertschien energia.

Ulteriuras informaziuns anfleis Vus sin powernewz.ch.

Gidei da reducir il consum d'electricitad, nus essan fetg engrazieivels.

Per damondas stat Hans-Peter Bundi, president OEM, bugen a disposiziun (079 681 63 03).

Salids amicabels
Ovra Electrica Medel
la suprastanza